



Fasnacht 2014

Mechtisch dyni Date ha, lyt de Chegelwaggis a

Hinter dir duet eine luure
In dr Hoggi duet er huure
Er beobachtet di ganz genau
Uf em Kopf e Schlapphuet in grau
Er isch gsi bi dr Enn Ess Eii
Aber hitte het äär jetzt frei

Fir d Fasnacht dien jetzt MIR an dir glääbe
- Kai Angscht, mer losse di do lääbe -
Mer dien nur luege uf di Feissbugg
Uf Guggel, Twitter und wieder zrugg
Wo du dr Duume uffestreggsch
Und is dermit verschräggsch

Mer wisse, was du duesch useloh
Dank WLAN uf dim heimische Klo
Au di Yyskaschte het das gmeerggt
Und di drumm mit Vitaminli gsteerggt
Er duet au sälber Broccoli bstelle
Egal, eb du das duesch welle

Mer hän di Fäärnsee ghäggt
Und dä sait is ganz diräggt:
Dr Sohn luegt s Dschungelbuech, du s -cämp
No e biz Fuessball und vo dr Arena s Glämp
Z Nacht bisch uf de Schmuddelsänder
Bis unter de Auge hesch grossi Ränder

Mer hän au e Bligg uf di Pee Cee welle wooge
Mer sin sproochlos, anders wär glooge
Was mer deerte alles dien gseh
- Ojeminee:
Uusziig vo dr Coop Bangg ihrne Konti
Und au die vom andere Conti

Wie d Rammel-Regierig ihri Speese duet addiere
Und die gälbe Ängel bi de Schwoobe dien blagiere
Wie dr Baragg duet s Händy vom Änschie abloose
Wievyyl Mool dr Noochber mues ins Reerli bloose
Was fir Witz macht dr Rocchi Massimo
Und sich mues vo Wältverbesserer verklaage loo

Mer hän au ohni grossi Trigg
Fetteli gseh vo dim Bäch und Gligg
Duet di das nid gratze
Wenn alli dien vor Lache platze
Mechtisch das wiirgglig mit alle daile
Wo um di Ufmerksamkait dien kaile?

Bi uns duet Daate-Priefig nimmi weh
Kriegsch d Leesige wie bi dr Eff Haa Enn Wee
Mechtisch dyni Date ha
Lyt eifach de Chegelwaggis a
Mer hoole dyni Date uuse
Au wenna uns duet gruuse

Apropoo: dä Zeedel muesch nimme em Obama schigge
mer hän dä scho lang bi dr Enn Ess Eii lo liige